

長安鎮志

長安鎮志序

竊有自長安來者爲道其名勝心嚮往在久之但遭逆
匪竄擾之後語焉不能詳是又不能盡歎焉近徐子映
齋以長安儒林儼生鄒先生所著鎮志見示披閱一過
而故址遺蹟歷歷在目并一切人文人物莫不詳且盡焉
不啻親遊其地而并勝于親遊也既自紅羊劫後世論
名區勝蹟都付荒烟蔓草中即其間文人學士一詠一歌
孝子列婦之一志一節輜軒之所不及採坊表之所不及旌
以及舊物細故湮沒而不彰在何可勝道哉而先生以是

書彰之嗚呼先生之志小先生之志大矣抑以自古賢達
者流多著作以垂不朽而區區一市鎮間每鄙之以為不
足道嗚呼孰知文人學士一詠一歌孝子烈婦之一志
一節輜軒之所不及採訪表之所不及旌以及舊物細
故女淫沒於賔達之心世又何限也後之覽其使僅作
游覽者勝觀殆法之乎窺先生矣然則是書也固曩
客所不能言也亦僕所嚮往而不可已也請以還質
先生

同治壬午歲次丁卯臘八日蕭山姚夔序



長安鎮志序

稽古名山大川勝境佳壤與夫賢達隱逸嘉言善政莫不皆
載之簡冊蓋所以揚名區之佳勝彰懿德之徽光以傳於
世良有以也如九丘禹貢寰宇記地輿志山海經載水土
之險惡人物之奇異所以資後人之學問而廣其知識也
如三墳五典晉之乘楚之檣杞魯之春秋自秦漢迄於茲
莫不有典籍所以明政治之得失褒善貶惡以遺後世為
懲勸以激勵之也是故國有史家有譜而郡邑皆有誌長
安鎮舊名修川蓋以南宋建都臨安鎮枕其要而更其名

馬其地今屬海甯州在城之西北為鈴閣吳楚四方之衝
衢古為儲糧之要地今為通運之總區抗紹諸郡商販咸
集焉其名勝陳跡固有不勝記者惜乎淹淪而莫聞者久
矣蓋以市井商賈不學無文雖知而不能言鄉里師儒苟
非博學好問而能文章者又不足以言至宦游之士大夫
世多役志於貨殖韓昌黎所謂得利則躍以喜不利則
戚以憂若不可生者又豈有志於著述而能言哉鄒
子儂筮籍隸修川幼習儒篤學好問每出遊覽凡有所見
聞必一一達之於詩以誌其要蓋有志焉嗣遭粵匪竄據

之禍顛沛流離而無所歸挈眷來越寄跡吾邑之陡壘鎮
隱於市求升斗祿以贍其家彬始相識見其不以患難貧
窶為懷不以貨財利祿動心曾次悠然吟咏不輟因奇之
而訂交焉始則以唱和相往來少狎則出其所著長安鎮
志以示且囑為序於其端予遠遊燕趙齊晉三十餘年而
修川近在隣府竟未嘗一履其地及讀所著志恍然如披
圖畫之在目一一可指而覩益欽其人之賢而嘆其才之
敏其所學蓋有濟也夫長安當逆匪盤踞竄逸以來兵劫
蹂躪士民流亡迹其佳勝塗炭殆盡乃得復爛然存於世

足恃以不朽者儷筮之功大矣吾竊為長安幸而且賀也嗚呼舉世熙熙攘攘皆為利焉自古固然於今為尤而能留意於嘉言善行有志於傳述而能言之者四海之廣有幾人哉嘗讀書而知經史文傳多成於古窮士騷人之所為然後知賢士君子之侘傺否塞而困其身者蓋天將以有為焉則鄒子之遭患難而處窮阨斯天所以勗其學而成其志歟彬也愚固學忤俗違眾毀多雖有所撰述不足以動時達之心目而轉致庸俗之誹詬嗟乎聖賢經傳且不免求疵摘瑕乃欲披拾六經之陳言以非駁俗尚之腐辭

求見賞於時不亦慎乎且學久曠而文多疎何敢僭竊為序顧儷筮好古慕道虛中求益慊慊若不足焉其年富志篤而力學進德庸有已乎竊感同志共類之難其人詎有不容辭者嘗聞君子有所不讓况彬素以贊樹人善為樂故又未敢固讓因道其情以為序蓋更有所望於儷筮者豈僅止於是而已哉

同治歲次丙寅中秋望前五日山陰陳敷彬文伯氏拜撰於玉蟾山麓之鉏月唵廬

金悅齋先生監來札

儂笙先生史席昨承示大著鎮志自謂剪裁不合體
格而問道於盲弟粗讀一周尚未領其細微而即其
大凡並無不合體格之處而又不見剪裁之迹是可
謂善於剪裁者似此著書更復何議至作序一事必
其人之才學識三者具備足以副此一書方可勝任
若弟之文字僅可以寫家信菲材淺見猶未免為鄉
人而遽欲西抹東塗直不知人間有羞恥事矣有方
台命尚祈諒之原書乞再留細讀另日奉還先此覆
請道安諸希宥照不一九月廿七日愚弟金監頓首

又

儂笙先生函文前者承示鎮志并命監作序當即奉
書謝不敏越日相見又固辭先生堅不許竊窺辭氣
竟似監能為而不肯為者此則冤枉太甚也凡一地
之志及一志之序必究其宏綱細目井井詳明而又
嫻于文詞方可措手先生生長此鎮學廣而聞多舉
凡故老之留傳往籍之記載日積月累宏于中而肆
于外下筆便成一大書監則拘囿於鄉曲之間學問
寥寥初不識長安是何境界盥誦大著如談十洲三
島迷離倘恍但覺其妙茫然無從贊一辭此是實情
竝非推託昔龍門謂閻巷之人非附青雲之士不能
施於後世昌黎作滕王閣序自謂詞列三王之次與

有榮施先生此書一出到處流布監苟能勉作一序
列諸簡首俾世間皆知有賤子此文人學士所深願
而不可必得者而顧推而遠之此豈近於人情哉先
生可以諒我矣原書奉還另日負荆領罰不一愚弟
金監頓首

修川小志目錄

河道
橋梁
堰閘
官署 職官附
鄉校
坊表
園亭
寺觀廟宇

里人



儂笙甫輯

Faint bleed-through text from the reverse side of the page, including characters like '全德', '修川', and '目錄'.

冢墓
風俗
物產
人物
寓賢
雜記

修川小志

長安鎮一名修川海甯州西北之一隅也四面無
山方廣僅五六里語也焉而詳所見亦小矣然古人
窮愁著書各有見地予生於是鄉自非窮愁曷嘗
留心於此後山曰士大夫見天下不平事不可懷
不平之意予固非不平而鳴者况布衣而非士大
夫乎嘗記辛酉秋紅羊劫至一鎮之人不克保其
鄉土携男挈女四散奔逸幸而獲全已無所歸矣
嗟乎昔之畫棟連雲今則荒煙蔓草撫今追昔能
不依一因表其所見所聞以類分隸之修川之典

故略云備矣知我罪我俟之後之君子甲子新秋
海甯長安鎮里人鄒淦述

河道 橋梁 堰閘

修川在浙江會城東八十里屬海甯州東至州城
二十五里西至仁和之臨平鎮三十五里南至海
十里北至石門縣十二里米市集烏杭紹甯三府
咸資接濟鎮無山惟離鎮五六里則州志所稱茗
山在烏然亦一小培埭土人呼之為山耳昔南宋
都臨安而鎮扼其要凡觀光上國待詔金馬門者
無不由此而進蓋上河之水直達艮山水門而下

河則江南川楚無所不通故凡談長安者皆略山
而稱水誌河道第一橋梁第二堰閘第三

大清一統志長安鎮在海甯縣西北二十五里與仁
和縣接界舊為運道所經宋德祐二年元伯顏軍至
長安鎮進屯皋亭山其後設稅課務并置驛於此明
初改稅課局嘉靖中驛廢今為商旅聚集舟車衝要

之地

鎮之名初見
元豐九域志

二十五里塘河

舊名湖塘以通湖水也水源自西

湖來達于運河宋史河渠志嘉定十二年臣僚言
鹽官密邇都城內有二十五里塘直通長安腴上

微臨平下接崇德漕運往來客船絡繹去歲海水
泛漲兩岸田畝無非決壞若更徑入于塘不惟民
田有鹹水淹沒之患而裏河堤岸亦時有潰裂之
憂乞下浙西諸司條具築捺之策從之宗鹽官令
陳恕為治多所更始因河流決溢募民于邑西達
長安鎮浚河築塘視舊加高廣以石甃遂無崩決
之患號甘棠堤 明蘇平甘棠謠甘棠隄上水平
溪野人掘河新築堤春風杏花三十里長安道邊
聞馬嘶使君考績朝天去沙隄惟見棠梨樹兒童
騎竹待公還父老攀轅願公住公今到家勿久留

驄馬重來隄上頭鹽官戶口三十萬寒則思衣饑
則飯我今試作甘棠歌父兮母兮可奈何 國朝
康熙十五年丙辰秋縣令許三禮開河自拱辰門
起北至長安西至許村止

許公塘河 東洛塘西石門界南舊無塘路康熙乙
卯冬許候三禮始築塘以便輓運民稱許公塘

建興湖 吳建興中開因名東西一十里南北六里
深五尺在文進橋東俗名賽西湖今漸濬而為田
也矣

龍潭 在中閘上有龍祠

文進橋 在州西北二十里即咸淳臨安志所稱長
安鎮處也咸淳志又云長安市在縣西北二十五
里豈宋時鎮與市分為二歟今則市與鎮合文進
橋南北僅一小聚落耳戰劾曾海甯州志云文進
橋舊名萬家渡橋在長安東三里明崇禎間建久
圯乾隆十七年里人鄒有泗勸捐重建乃改今名
陳琨為之記

仙鹿橋 在文進橋西三里新堰之左康熙十二年
建里人見一鹿絕塵而奔因名舊為三環洞小平
橋嘉慶三年里人陳春熙等捐錢改造

虹橋 橋亘如虹因名咸淳臨安志又名長安橋跨
運塘河進橋東北長河堰在馬道光二十八年五
月雷雨為災平地水深數尺橋忽圯咸豐二年重
建 明胡奎虹橋夜月詩渴虹飲澗不曾收化作
飛梁臥碧流銀漢水分天上下白蓮花出東頭崔
歸華表吹笙夜龍獻明珠解佩秋載酒長安三十
里醉呼鸚鵡更陪舟

廣福橋 在虹橋西俗名新橋臨平之水出焉
小橋 在廣福橋南南塘之水出焉合流至于運塘
河

東文橋 在仙鹿橋南

西文橋 在仙鹿橋南

東橋 在文進橋東南

陳家石橋 在文進橋西南臥龍印前

楊家石橋 在陳家石橋西

逢嘉橋 俗稱馮家橋在新堰北跨運河道光二十

五年圯三十年里人重建

萬壽橋 在逢嘉橋東北跨運河乾隆間

高宗純皇帝南巡過此橋造成里人因效華封祝堯故事
名之萬壽而名其巷曰萬壽巷

上

盧家橋 在萬壽橋北跨運河

興福高橋 在盧家橋北跨運河運糧船停泊於此

仁壽橋 即章婆堰橋塘棲之水出焉北流至於石

門道光間橋圯咸豐五年里人重建遣封布政司使

陸景頤壽七十景頤藉姪元朗貴素把持官府鄉

曲有不平事任意武斷之鄉人之媚之者無不為

橋成於景頤稱壽之日因改名曰仁壽云

永甯橋 在虹橋北長河堰之間上河至此始斷故

俗稱斷河頭已塞

平橋 在永甯橋北已塞

包家橋

在盧家橋東

定香橋

在包家橋東南定香寺前

猪毛橋

在包家橋東

亭子橋

在猪毛橋東褚墩廟之左

雙霸橋

在盧家橋東北於便民倉前望^之兩橋相持

如犄角然

迴龍橋

在龍祠左橋下水西流故名迴龍

曾家木橋

在迴龍橋西南

雙橋

在曾家木橋西古旌忠寺之前

蒲鞋橋

在雙橋西又西曰唐家橋都家橋馬家橋

而諸小橋之失其名者又不可以教計也

長安堰

一名長河堰見陸放翁入蜀記咸淳臨安

志又名長官堰或訛作長家堰宋熙甯元年十月

詔杭之長安秀之杉青常之望亭三堰監護使臣

並以管幹河塘繫衝常同所屬今佐巡視修固以

時啟閉從提舉兩浙開修河渠胡淮之請也明永

樂十八年夏秋霖雨風潮壞長安等壩陷四千五

百餘丈天順元年春正月杭州知府胡濬治海甯

縣運河兼修壩閘國朝道光二十八年五月霽

雨為災堰壞里人築以瓦石遂廢不修元袁易

過長安堰詩霜落天清木葉零我非王事亦曾征

三更燈火魚龍動千里星河鴈鷺鳴大舶低昂銜
尾進扁舟來往一身輕抱關恐有高人隱野客低
頭愧送迎 國朝計桶夜過長安鎮詩燈火長安
鎮河流上下爭市分粟米價壩轉軸轆聲順水心
偏急歸帆夜獨行寒塘刁斗警風雨又三更
長安新堰 許三禮縣志云長安為舟車往來南北
衝要之地元至正七年置堰於舊堰之西州判官
呂忽都塔兒董役有成堰傍居民周姓者以附近
田三畝拓之舊有官舍碑亭立碑於內往來商船
止收筏纜錢二十文由是堰益增廣至今兩為民

便 元末謝肅過長安壩詩海甯州西來往頻長
安壩上最傷神東風桃李非無主歸燕棲基不見
人天末雲帆隨望遠雨餘芳草喚愁新故鄉門巷
干戈底越客相逢話是真

何家壩 在盧家橋東今廢

陡門壩 在石虎街今廢

雲洞 在西關廟武帝廟下

姚家笕 在仙鹿橋東上河之水出焉

上閘 中閘 下閘 相傳始於唐許三禮縣志云
自杭而東水勢走下稍旱則涸故置閘以節宣焉

宋紹聖間提刑鮑累杪樵木築之重設陡門二後壞于兵火八年運使吳請易以石埭歲久莫詳二使者名崇甯二年有旨易閘旁民田以濬兩澳環以堤上澳凡十八畝下澳百三十二畝水多則蓄于兩澳旱則決以注閘淳熙二年兩浙漕臣趙磻老言臨安府長安閘至許村巡檢司一帶漕河淺澀請出錢米發兩岸人戶出力開濬紹熙二年提舉張重修三閘嘉定初令潘景夔請開閘旁兩澳之塞不果行宋時守以閘兵入元閘兵廢兩澳為民所侵至正十年知州張光祖修三閘以栢木為

之上置銳環旱則閉潦則開明以來無所考蓋久已廢棄也凡自下閘九十步至中間又八十步至上閘中下兩閘皆可行舟水自盧家橋來分流入迴龍橋而西惟上閘處上下河之間尚存其舊云宋范成大長安閘詩斗門貯淨練懸板淙驚雷黃沙古岸轉白屋飛簷開是間衰丈許軸轡蔽川來千里擁孤隧萬馬盤一坏篙尾亂若雨檣竿束如堆催、勢排軋洶、聲喧飀偏仄復偏仄誰肯少徘徊傳呼津吏至樊蓋凌高埃噤嚙議譏征叫怒不可裁吾觀舟中子一一皆可哀大為聲利驅小

者饑寒催古今共來往所得隨飛灰我乃羈旅人
胡為乎來哉

魏郭閘 在何家壩東

官家壩 在魏郭閘東南

張宅壩 在西關廂西北

官署 職官附

官猶水也民猶舟楫也水以載舟亦可以覆舟要在賢有司御之得其道耳御之得其道則浪靜波恬民樂有生之業也誌官署第四而職官附之

州判署 乾隆三十九年陞縣為州改縣丞為州判

分駐長安鎮四十年建署在鎮西蒲鞋橋西大門

三楹儀門一楹大堂五楹捲軒三楹土地祠一楹

二堂五楹內住房三楹東西耳房四楹廚房三楹

客房三楹書房三楹吏房一楹皂隸房一楹改建

工料即以丞署變價抵用不敷知州戰劾曾州判

嚴灝捐補署基地三畝三分三厘監生陳克欽捐
乾隆年任

嚴灝大興人由保舉

蔡文彬赭山司巡檢署

蕭超羣德陽人由國學

周丕安徽太湖人監生

陳汝欽四川金堂人監生

范樞山西介休人監生

孟文薈河南洛陽人監生

成履觀安徽青陽人監生

鄧必玉安徽桐城人監生

鍾琪順天宛平人附生

韓勝祿江西玉山人監生

金瑄安徽婺源人監生

胡映棠江西宜春人監生吏目代理

譚增江南上元人供事

李承起江南武進人附監生

金宗夏河南祥符人監生

嘉慶年任

蕭超羣

曹鎬貴州畢節人監生

鄒曰瑞江南鎮洋人監生

王覲光河南睢州人乾隆辛卯副榜

湯懋修河南睢州人監生

李簡德字吉亭陝西朝邑人拔貢生

金國勳安徽桐城人監生

王廷琬江西上饒人監生

袁佑江南吳江人監生

宋喆字述堂貴州甕安人拔貢生

蔣夔字青荃江南長洲人附監生有修川遺愛

集

朱淵江南長洲人監生

韓承志江南長洲人監生

戴彝順天大興人監生

謝燦順天宛平人吏員

陳浩廣昌人監生

王鳳梧順天宛平人內閣供事

吳嗣英字陳川江西新建人持守有體

道光年任

馬心印山西介休人監生布政司經歷署

李文昱湖北監利人監生

吳嗣堯

胡澤桓江西樂平人監生

李承恩江南沛縣人監生

伍鳳儀順天大興人監生

汪士瀾字竹香安徽旌德人監生

汪大煥湖北漢陽人監生

謝蘭生江南武進人監生

李仙根字琳園雲南太和人監生

趙廷詔直隸青縣人監生

謝丹詔廣西永福人廩貢生

咸豐年任

宗昭綸廣西人監生

^培楊善滿洲廂紅旗人府經歷署

嚴錦堂江西人

長安汛千總署 即巡鹽千總雍正六年建在鎮北

計屋三進并客廳書房廚房耳房共二十二間營

房三十六間戰劾曾州志云雍正六年總督李衛

題請設立巡鹽千總一員駐劄長安鎮兵一百名

撥入撫標左營管轄巡船一十四隻于杭嘉湖三

郡地方巡緝私鹽

雍正年任

韓景琦字衛公山東人

張爵福建人

乾隆年任

孫德字禹公仁和人

王英字憲章仁和人

王勇字尚賓仁和人

魯旭字體仁仁和人

王世祿字晉章長洲人

侯國雄字信臣仁和人

季雲字覲候仁和人

王佐字廷輔福鼎人

嘉慶年任

失考

道光年任

二十五年以上失考

邊上進錢塘人

咸豐年任

邊上進

守禦千戶所 國朝守禦所專輓漕運移駐鎮北大
王廟西僦居民舍

職官失考

便民倉 蔡完海甯州志云洪武年間建于長安鎮
東關運河水次正統八年火徙於運河西岸址廣
六十畝有奇環以墻外有巡警火衛三尺有餘成
化十八年參政韓斐建廩八十楹漕糧于此免運
宏治十六年令孫吳重修十八年縣丞鄧珏建官
廳廨舍管糧丞自十月開倉後恒駐劄其中上司
之督糧者亦時至焉萬曆中右布政竇子偁創廩

三百六十楹後遞修遞圯 國朝康熙十一年知
縣事姜煦計併里為廩鼎新創建約三百三十楹
云十四年知縣許三禮據通縣公呈以漕南永並
收于便民倉按海甯漕米徵收便民倉其南米永
平徵收縣治常平倉長安距州二十五里兩處徵
收民苦分涉亦不便于官紳衿里民將南月漕米
俱上納便民倉並倉分廩民無分頭上納之苦官
省兩頭徵收之煩時人兩便之乾隆十四年令劉
守成因倉廩日漸坍塌修建共一百八十楹咸豐
十一年燬於賊

長安驛 唐貞觀五年置桑亭驛八年改義亭驛宋
因之元設水馬二站馬六十匹舟六十隻至元間
改長安水驛按縣西南舊有賦亭驛唐開元中柳
遵立元^季至元間併作長安水驛云明朝奏革以吳
山驛至皂林驛僅百三十里也又有海昌亭在上
閘之旁自杭循東道行上^河湖必^於于此艤纜以需
啟鑰閘亦有亭舊無名今俱廢 元薩天錫宿長
安驛詩壩北壩南河水平客船爭纜水雲腥鄉音
吳越不可辨燈火滿^船舫如落星 水面風來動
楊柳客舩爭纜月明中遠人江海多歸思臥看流

星落水東

長安稅課局大使 許志稅課局有四今草明嘉靖
三十年任蔣浩沅州人

長安壩官

明史職官志長安壩官掌啟閉蓄洩許

志官設車注每船過收筏纜錢二十最為冗末崇
禎二年草明嘉靖三十年任宋漢河間人由吏負
三十三年任陳謨龍溪人由吏負後無所考

鄉校

曰民之中士為貴其所以貴之者非必章甫文身
而已矣我國家承平二百餘年食毛踐土雖農
工商賈猶思自盡其力以仰答鴻庥為士者其
可不飲水思源如范文正公之為秀才時可乎此
鄉校所由志也修川苦無前志遠莫能稽惟就其
近而可攷者彙為一集而仕進封贈附焉誌鄉校
第五

歲貢

康熙三十五年壬申

鄒直夫字古愚號魯齋

嘉慶十年

鄒諤字籟畦號介石府學

道光十九年

顧嶸字春臺

咸豐二年

陳惟亨字浣江書法梁同書求之者無虛日

優貢

道光十一年辛卯科

許誦恒丁酉舉人

舉人

乾隆十二年丁酉科

李紹安增春秋四十一名

乾隆四十五年庚子科

沈德基附書七十六名

陳景曾字升嘉附詩七十九名

乾隆六十年乙卯科

曹宗閔字雲谷號廬峰廩三十八名

嘉慶六年辛酉科

陸景華增二十名壬戌進士

嘉慶九年甲子科

梁齡增廩二十二名

嘉慶二十一年丙子科

陸元煊附四十六名丁丑進士

嘉慶二十三年戊寅 恩科

許楣附七名癸巳會元

沈德軫字星槎廩六十五名

嘉慶二十四年己卯科

許棧增七十一名癸巳進士

道光元年辛巳 恩科 道光五年乙酉科

都嶧增七十一名 朱傳曾順天鄉試

道光十五年乙未 恩科

鄒鵬字雲博號子翼後改名振鳳廩貢候選訓

導五十二名任蕭山縣學訓導陞國子監監

丞

何國琛增八十六名辛丑進士

道光十七年丁酉科

許誦恒棧子字築夫號少珊優貢候選訓導八

名任內閣辦事中書

道光二十四年甲辰 恩科

沈兆元德軫從子字又亭增四十六名
道光二十九年己酉科

陳曷煊字二南增三十四名

咸豐五年乙卯科

何銘壽國琛子監生順天鄉試

咸豐九年己未 恩科

吳昌禧附二十六名

副貢

嘉慶二十四年己卯科

陳攀龍景曾子字望樓附八名

道光二年壬午科

汪澄之字秋潭附十名奉化教諭後任山東文

登知縣

咸豐元年辛亥科

朱蔭穀蔚子附十一名

咸豐八年戊午科

范廷勉附

進士

嘉慶七年壬戌科

陸景華二甲官溫州教授

嘉慶二十二年丁丑科

陸元煥景華子字韞山號虹江三甲刑部主事
至江西布政司署江西巡撫提督軍門

道光十三年癸巳科

許楫字金門號辛木會元二甲戶部主事

許榘楫胞兄字叔夏號珊林二甲即知縣國

補山東平度州知州至江南蘇州監金石館議叙
常泰兵備道珊林辛木皆善隸書

道光二十一年辛丑恩科

何國琛字寶田號白英二甲戶部主事至襄陽府知府加道銜

仕進

朱有萊廣西象州知州 谷鏞雲南廣通縣典史

祝長清字東園廩貢歷署遂昌龍游訓導

陳守曾東河管河縣丞

鄒樹勳湖南候補主簿署湘潭縣丞

朱坦署湖北京山縣丞善山水

曹瑩字東梅附監湖北漢陽縣丞

朱有倬廩貢歷署石門壽昌訓導

朱鈞有萊子廩貢字筱漚歷任至蘇州府知府署

江蘇按察使咸豐十年四月粵賊陷蘓州盡節

死

封贈

中憲大夫

陸鳴玉以孫元煊官贈

陸景華以子元煊官贈

陸景頤以姪元煊官贈

朝議大夫

許允仁以孫榘官贈

許士廉以嗣子榘官贈

奉政大夫

陸鳴盛庠生以姪孫元煊官贈

奉直大夫

朱有倬以弟有萊官贈

許士傑以嗣子楫官贈

許士斌以出嗣子楫官贈

許履以嗣子誦恒官贈

許樟以姪誦恒官贈

承德郎

陸景思以姪元煊官贈

陸景商以姪元煊官贈

文林郎

陸德賢以孫景華官贈
汪鉞虔以子澄之官贈

武義大夫

倪咸惠以曾孫承璐官贈
倪咸亨以出嗣曾孫承璐官贈
倪兆鯤以孫承璐官贈
倪天僕以子承璐官贈
褚顯時以外孫倪承璐官贈

武舉

乾隆^{六年}辛酉科

倪兆蛟字子雲

乾隆^{九年}甲子科

倪天儁字九錫官福建莆田千總

乾隆^{七年}壬申科

倪承璐甲戌進士

武進士

乾隆^{十九年}甲戌科

倪承璐天儁子三甲任福建邵武城守營參將

坊表

節烈名教攸關足以炳大義而勵貞風者也黃鵠
之悲栢舟之烈其苦如荼其心如鐵其人顧不重
哉誌坊表第六而未旌者附之

節考坊 嘉靖間為工部主事許元奎妻勞氏立許

志云在長安鎮今燬按元奎既壯成進士而婚卒
時僅四十歲蓋安人之寡方盛年也又為廉吏婦
甘荼苦操作不休壽至八十餘嘉靖四十年御史
張景和疏題勞氏節孝樹坊以表之蓋命婦被旌
異教也今其裔孫仲芳之妻徐有懿行康熙間熊

僉憲旌其門曰賢母皆謂許氏世秉內則云

節孝坊 在西關廟外嘉慶二十二年八月為鄒魯

昭妻楊氏建

節孝坊 在文進橋東為李紹昌妻祝氏建

貞女坊 在文進橋西為吳銓妻沈氏建

節孝坊 在西關廟外嘉慶六年十二月為陳禹宗

妻杭氏建

節孝坊 在西關廟外嘉慶十七年八月為朱有九

妻張氏建

雙節坊 在新堰東許氏宗祠前為許士廉妻張氏

許士斌妻姚氏建

未旌

沈鍾英妻徐氏

鄒作和妻章氏

曹瑩妻梁氏 氏隨夫任漢陽縣丞夫卒于官子楚

生纒七歲氏典衣質珥扶柩回家苦貧紡織得錢

以教子卒以成立親見子孫娶婦年八十三卒

^蘇烈婦 烈婦故都督倪公承璐女孫蘇水生茂才

海之配也咸豐十年秋七月粵匪寇長安鎮水生

避鄉被擄其母沈太孺人投河死賊以烈婦有姿

強使侍酒婦不從戟手大罵，且哭賊怒斫其首
及首落項中猶鳴，不絕聲時隣叟在賊中親見
婦死時狀出而言之如此

朱逸齋妻王氏表家咸豐十年七月賊掠長安鎮擄送
齋去婦大哭抱三歲子投水死

陸蓮身妻周氏結福賊至鎮殺蓮身於文昌宮氏聞夫
死哭泣十餘日乘間自縊死

楊烈婦 烈婦姓陳氏名貞姑里人陳觀國次女適

楊氏咸豐十一年賊隨父避兵省垣冬十月省城復
陷氏投井死

園亭

名山勝水有跡皆陳茅屋竹廬無人不哭昔建書
院而藉園亭之石今築土闈而取書院之磚養老
者固不能詔厥孫謀會文者又何能汎陳治道也
哉誌園亭第七

西莊書屋 俗稱馬家花園在鎮西北巒壑天然名
賢題咏極一時之勝文學馬驤建 范驤詩吟望
樓高天尺五翠竹青浦山靜古春花秋月連壺觴
東却西村樹社鼓壠水蒼烟佳氣浮步月瞻雲心
獨苦我來大笑傾綸巾萬斛塵埃快一吐堂懸冰

雪照鬚眉碑留篆籀驚風雨漁翁歸棹極頭船武
陵溪上桃源譜後來誰解賦登樓飯潁山頭尋杜
甫 丁澎詩徑反環流水堂開列翠屏苔花迎雨
滑松葉鬪霜清青笑傲看人世徜徉任醉醒日殘
幽壑晚鷗鷺起沙汀 朱嘉徵詩憑蘭坐高閣秋
月挂遙岑流影隨圓缺清輝無古今花邊長斲藥
竹下可携琴人跡蓬門少當堦綠草深
環綠軒 蔡完縣志在長安鎮環水宗濂為鎮人游
氏賦水竹佳致詩書雅懷樂只君子悠哉悠哉按
環水不知其地游氏子孫亦鮮矣

耕餘小圃

在文進

橋南

鄒養素先生

素標手創別

其孫有田 田治脩極幽趣其紅白千葉山茶尤稱

僅見道光十年大半燬於火仰山書院之建山石
皆取之園內云 鄒諤酌客耕餘小圃酌池非弟
詩雲樹深村裏吾家舊有莊一圩秋稼早半畝水
蓮香涼簟呼僮展新衣供客嘗相看愁鬢影且復
醉衝觴

仰山書院

在覺王寺後建於嘉慶七年院之初建

沈君毓蓀實創其議糜白金二千鳩於眾三之一
自任其二既成又獨任延師課士諸費者六七年

簡修

張元

家本中人產以是日落有朱大倫者沈君知其誠
篤召令守院大倫執役二十餘年甚謹年八十餘
卒肄業之士設位哭之初許公三禮嘗權設書院
於覺王寺以故沈君於寺旁規建書院古三女堆
在寺後請於有司伐石表墓而後度地興工後有
造作不得逼近墓址云 孫元培記海昌長安鎮
之有書院也初始於沈君毓孫陸君鳴盛陳君光
庭都君復基倪君善治鄒君諤倪君穀城時嘉慶
七年儀徵相國阮公鎮撫吾浙頌額曰仰山寓高
山仰止之意亦以登書院之樓可望見臯亭一角

故云厥後費用不給課藝幾廢且甬道門闌為工
甚鉅事將中輟賴王李三州牧吳太史敬羲主持
風教或捐廉或勸助兼得陳君惟德陸君景頤許
君棟鄒君履墀汪君澄之籌之甚力而書院之講
以全中為崇雅堂桃李門內有樓曰更上一層樓
樓之前有亭曰坐春亭南壘石為山曰小獅林環
山雜蒔花木周以曲池至於邃室修廊無不整而
潔諸生以時會課于其中膏火有資院之東別營
蒙泉義學俾童穉之秀者咸肄業焉其規為秩然
備矣自書院之建也迄今將四十年主講席者皆

通經宏願之儒鎮之士拔巍科登顯仕者接踵而
起然其人不僅以科名顯皆能飭躬砥行不負平
日之所學若夫伏處之士亦各盛文藻礪廉隅吁
此固悉由涵濡於詩書齊茹乎道真學有以成之者
也昔賢謂學校之役所以端士習正人心厚風俗
書院蓋以輔學校也其廢其興所係顧不重耶司
事諸君既慶鉅工之獲歲又懼其久而或渝也屬
為之記以誌後之人後之人守不易之規縣、延
、以及於無窮則不特科名弗替于以端士習正
人心厚風俗其所益為何如哉

問渠亭

在書院前義塾之右文津橋上

杏花村

在逢嘉橋東進包家街里許有梓樹高三

丈大四圍相傳為唐宋間物從梓樹下側而西

杏花村在焉每至二三月花紅如錦鎮之人担酒

挈盒聚飲於此近三十年游人竟不能指其處

鄒諤杏花村酒家詩遠波渺、柳含烟幾日東風

欲放顛纒是清明絲雨歇菜花黃過寺門前

陳木扇

高丈許以木為之上刻君恩不忘刻木為

記八字蓋醫生自詡其世業而誇耀其祖德也在

虹橋西周家街左里人稱陳木扇云州志云陳

鴻典字雲書其先汴人遠祖沂宋建炎時扈跸南
遷嘗治高宗妃危疾有奇効賜御前羅扇子孫遷
長安鎮後分居城市凡世其業者各樹木扇於門
鴻典雅擅文譽食饌邑庠中年病瞽目廢益精脈
訣尤善婦人科四方就治者填塞戶巷既歿而所
遺方書猶流傳遠近

樹根居

在覺王寺西長池之前陳益齋先生守謙

別業也中有詩洞天書畫舫賓月館野翁樓諸勝
處極雅人之深致後先生次子澗香丈又於其西
建瀟碧山齋植竹數十竿豪情逸興繼響詞壇予

與澗香次子朗山傳玉稱總角交而其第六子傳

琳又予妹壻故常至其處觴詠流連時復連旦後

竟改屬朱氏咸豐辛酉粵賊據鎮毀于火 陳守

謙野翁樓題菜花詩自隨巢居子非昨而是今何

羨花富貴漫論屋黃金條風從東至春雲吹滿襟

灌花已三復清流猶一臨坐我野翁閣身輕如野

禽菜畦花淡泊想見田父心開當來燕日香過浴

鷺溇莫怪古逸士樂此投朝簪春拖雙蠟屐一往

黃雲深花田半肥沃此即勤者箴放眼春似著我

下里吟胸無一塵染何妨春事侵村童詎解事指

我笑不禁看花弗遺野母乃逸則淫我曰汝否
有曲誰知音鐘期既難遇甯撫無絃琴形骸脫放
浪息機留漢陰語歇村更靜衡門無人尋濁酒傾
老瓦芳菲未銷况却嗤牛背客惟戀桃花林 又
野翁樓為菜花邀聚即請同人正和詩春色富天
地酒徒狂古今何足嗟泥滓况逢花如金樓高老
眼豁陽春開我襟千畦芳氣足不虛此登臨一握
故人手得朋先幽禽黃墟已陳跡皇天留同心真
率復此會韶光東逝潯記否挑菜節我先醉墮簪
年豐酒尚薄休辭千杯深百味菜長久可為良友

歲縱是五陵客須和田父吟若問春幾許未遭顛
風侵野春亦嫵媚太上情難禁我知花喜我好色
而不淫獨愧衆年少歌樓競知音壘雲聚遠黛溪
水流清琴深村寒食過養花天微陰月生客初散
餘香夢幽尋幸陪鶴俯仰笑指鷗浮沉纔化雙野
蝶一聲鐘出林

紅欄杆

在盧家橋西塊

之北

以木後陳又班先生易

以石而塗硃其上

一閒軒

在定香寺左杭州趙一漁起詩社於此

張子真先生復一閒軒消夏記已亥長夏返閑無

俚一漁趙子約溼修川先期過行鼓櫂繼訪招提
偕詣榻掃幽軒慕逝暑暄極鬱陶爾於是趙子廣
陳圖史約列尊壘嘉客惠然酣茗鮮倦天機橫發
世態悉捐河朔昔游庶乎不讓時迺颯霖互興扇
灑彌夕枕簟深清渺越恒俗迴憶逐蹤川陸杞軌
疲瘁英雋呈離豪場情雲幻形羈性枯曠放缺如以
視趙子跡遊塵至心遊於穆迴莫逮焉勝境偶棲
良緣匪淺重修清福後會與之

十
寺觀廟宇

李洪記云海甯風俗簡儉農夫深耕蠶婦織絳樂
歲家給人足斥其贏以奉釋氏惟謹故僧坊柳比
繡褶塞路不耕荒而仰給于民者不知其幾千指
也修川僻在一隅若在寺若菴若觀若廟有如此舉
一隅而三隅反餘可知矣雖然古有之曰能禦大
災則祀之能捍大患則祀之廟祀之神固皆有功
德在民未必盡為緇流哺餒地也若家廟以奉蒸
嘗而紀譜系尤賢子孫之責也故連類書之誌寺
觀廟宇第八

覺王寺 在廣福橋北唐長興四年建名正覺宗治
平二年改今額元末兵燬明洪武初復建二十四
年立成叢林 國朝順治五年僧行立重新乾隆
十八年僧傳文募葺創始於五十五年落成於嘉
慶五年里人曹紹撰記道光十五年二月重建觀
音殿至六月成里人朱燮撰記按州志海昌八景
有長安曉鐘即此處也 宋釋惟肅覺王結大界
碑記略長安為鹽官所屬鎮覺王寺在鎮之西一
徑直北數百步坐古三女堆墩始建于李唐有正
覺寺名逮錢氏之世屋宇墮廢但存塔基蓮花幢

石尊像而已是時文穆為太師令公判府事有邑
民盛瑄吳迥者乞就舊址重建藍宇公從其請寔
寶正六年十月也至宗治平二年改賜今額自寶
正距今元豐八年一百五十有七載矣雖山門佛
殿法堂方丈僧房廊宇悉備惟大界未結尚存自
然之地予嘉祐庚子歲為主僧惠嵩請居方丈凡
十載未嘗一日不思結界焉無何以師老却歸弗
果越十五年又為主僧智淵敦勉復來由是準毘
尼秉羯磨立標相以結之即元豐乙丑歲正月十
一也噫予之往來此寺也二紀有餘矣攷乎垂剏

僅二百年而結界之務今纔成辦乃知劫火不壞
之法豈偶然而得行與 明蘇平長安曉鐘詩萬
戶千門曙色深鐘聲隱隱出前林雲邊斷續連更
漏郭外鏗錫雜梵音候館驚回羈旅夢征途喚醒
利名心不知有客忘塵事枕上詩成月未沉 國
朝范驤詩梵宇唐封舊招提漢壠西地偏梅雨溼
人靜竹鷄啼青杉夾道綠莎滿留與支郎印馬蹄
翠筠菴 在覺王寺旁康熙間寺僧齡石建花竹幽
蒨亦禪栖勝地也
雲菴 在便民倉前一名齋僧堂康熙六年僧勤石修

建

淨妙寺 許三禮志云宋嘉熙間建元末兵燬明洪
武二十四年立成叢林二十八年建鐘樓今廢
定香寺 在萬壽橋東宋開寶元年建舊名茶毗菴
治平二年改今額明初廢 國朝康熙間重建道
光二十四年立成叢林佈置華麗不減覺王寺皆
陳又班先生定遠創首故于蓮波藍贈先生詩有
點綴香林造化工之句于不知何處人嘗寄寓寺
中題壁皆滿寺東偏為同善堂惜字施材皆於此
國朝沈毓蓀秋暮過定香寺詩荒原日暮氣蕭

條精舍幽尋遠市囂楓樹夕陽雙古剎蘆花秋水
一平橋香烟漠漠迎空翠磬響泠泠落碧寥思續
禪房花木句廬陵遺恨未全消

竹林禪院

在定香寺後康熙十一年里人許祚建

詳冢墓

國朝張駿游竹林寺詩得偷閒處且陶情看竹禪房起晚晴
畢竟山僧閒勝我綠陰滿榻有鶉聲

毘盧菴

在文進橋北

青蓮菴

在文進橋東建興湖旁又名石佛亭修竹

茂密內供石佛三石座一相傳唐尉遲將軍監督
砌開取起有乾隆丙戌年僧我淨恒修刻字

淨簡菴

在正心斗閣東北

印月禪院

在新堰東蔡家塘內有牡丹極盛

梵林菴

在何家壩

華法菴

在便民倉北

香海菴

在馮嘉橋北

太平菴

在仙鹿橋南

興福菴

在長河堰東胡令公廟後

保壽菴

在新橋巷

藥師菴

在虹橋北周家街右

大悲菴

在覺皇寺東北

如意菴 在周家街內

紅觀音堂 在小橋南

曹菴 在官家壩西南

古旌忠寺 宋嘉泰二年建于鎮之北元至順間火

遷雙橋之中後併淨妙寺明萬歷間即舊址重建 國朝

乾隆十三年又燬十六年知縣劉守成勅捐重修

咸豐四年築照牆大書長治久安四字刊之石俗

稱關帝廟 國朝陳守謙雙橋關帝廟詩靈風不

斷野煙昏一水雙橋抱寺門回首孫曹成底事獨

留夜月照忠魂

武帝廟 在廣福橋西 國朝康熙十一年許候三

禮創置廟宇下開雲洞乾隆三十六年燬於火里

人李麟等重建

東關帝廟 在東關廂明初閭建有永樂三年石刻

東嶽廟 在便民倉北嶽神初號府君宋真宗東封

尊為天齊仁聖帝自是州縣皆為立廟

胡令公廟 在虹橋之左元杭州路鹽官州儒學教

授徐圓碑記云令公姓胡名暹字進思婺州東陽

義烏人唐憲宗朝佐中丞裴度平淮西以功陞武

任將軍宣宗時奉命至海昌召禪門齊安國師師

演法謝恩就坐而化將軍回至長河過海神祠亦
立化于庭有司申聞宣宗遣桑稱二御帶追封齊
安為悟空禪師進思為昇平將軍與海神共祀至
宋康王南渡乘駿過長河無船可渡入廟叩之出
門忽有大舟迎王王問其名居曰桑稱二姓本里
胡進思家人也建炎元年王遣官召進思併桑稱
二人里中並無因廟中有胡將軍碑載將軍往海
昌召齊安國師事蹟州官申復降詔勅封令公海
神與桑稱皆進王號同祀土穀廟號威烈赫靈之
殿秦定間復有方太守入廟禱祀蝗不入境之異

其父□□方虛谷任婺州路候備知令公事蹟婺
州見有永康縣胡公祖廟太守命里人重立碑石
云今按宋圖經云令公未詳其始臨安志智果院
彌勒閣註云晋天福四年錢王遣令公胡進思往
婺州五代史胡進思以舊將廢吳越王侑而立俶
攷郡志總圖赭山北有令公塘豈吳越王時令公
曾築塘故有祠廟欵又按戰効曾州志令公名暹
字進思與吳越時名進思字克開湖州人者別是
一人龔茂良靈昌廟記誤合為一舊志流傳遂不
之辨金志亦兩存之今為刪正云云則戰公以徐

圓碑記為可據而獨不思乎曾築運塘之說也備書以志異聞許三禮志至正二十年被燬明嘉靖十四年重立杭州府志云 國朝康熙六十一年從祀潮神廟雍正十一年從祀海神廟乾隆二十一年里人陸彬等清理廟址重修廟後神墓在烏幽城歲久傾圮四十一年道士王世昌修整 國朝陸嘉淑泊胡令公廟詩長河壩側水潺湲黯淡靈旂閃夕烟泥馬汗銷人事改神弦猶唱建炎年

崔府君廟

在新橋南秦嘉系海甯志云崔府君祁

州

鼓城人父讓禱于北岳夢帝賜美玉二枚吞之

隋大業二年六月初六日生因名珽字子玉為滏陽令多異政能斷冥事卒後唐太宗感夢封護國顯應公宗真宗東封加封廣佑王高宗南渡夜憇府君廟有神扶其首起知追兵躡之急忽見一白馬乘之宵遁行七百里至禦兒鄉其馬遂不行乃泥馬也帝至杭首為立廟賜額顯衛所至皆有祠又名亞岳

元師廟

在何家壩東祀地祇東嘉忠靖王

褚墩廟

在元帥廟右祀明嘉靖間勅封土穀神金

大明王王之出蹟無考

太平廟 在雙壩橋北今廢

金龍四大王廟 俗稱南大王廟在古旌忠寺東乾隆二十二年建神姓謝名緒以謝太后戚畹絕意仕進隱于金龍山德祐二年元人昇太后赴燕緒大慟赴水死尸逆流而上經旬不仆遠近駭以為神葬於金龍山之麓元末鄉落皆夢緒為神其後往來擁護漕河屢著靈異云 國朝順治二年勅封顯佑通濟金龍四大王

北大王廟 在東嶽廟北祀金龍四大王以在鎮之

北欲別於南故名

蕭王廟 在文進橋_南祀明嘉靖間勅封土穀神蕭大

明王 國朝乾隆十四年里人鄒有泗重修按嘉興圖記云元蕭穆拜尚書僕射後封蕭王立廟遠近祠為土穀

烏樓廟 在文進橋西祀蕭大明王俗稱五倫廟錢泰吉海昌備志因之實俗語之沿誤也廟有梓樹四章皆大十圍

尹墅廟 在文進橋北魏郭開東南

尹墅新廟 在舊廟之左_{道光間}里人王泳建

英濟侯廟 在下閘俗稱張六老相公廟祀蕭山布

由姑本西湖游覽志五十卷實開湖山便覽之先

丸費五百十餘十有月刻刷成就事呈

管領主人一覽勢利修理約何日可了矣

并神示西府修理性形以備政考揣我中

法可

西湖游覽志

典之仁久之人

秋也

弟也

介之

其

衣張六溺海為神故又稱捍沙大王朱一是天仙
府廟記云廟中附莫濟侯張公張裔出蕭山贅海
甯陸氏或云神即宋工部郎中張公夏按清波雜志
云錢塘江邊土惡不能隄錢氏以薪為之水至即
潰皇祐中工部郎中張夏出使置捍江兵五指揮
專株石增修眾賴以安邦人為之立祠朝廷嘉其
功封甯江侯有功於民則祀之兩張公之奉嘗其
未替乎故兩存之

老相公殿

在長河堰上祀張六老相公

玉宸道院

在蒲鞋橋西宋咸淳間建元末兵燬重

建

正心斗閣

在定香寺東久圯道光二十七年里人

葛某倡捐重建

文昌宮

在開塘灣向供奉于旌忠寺殿左 國朝

乾隆元年知縣林緒光勅建行宮二十四年知縣

劉純緯倡捐復建前殿

魁星閣

在文昌宮前臨河

龍祠

在開塘灣龍潭之上宋咸淳年建 國朝乾

隆二十七年道士金靜涵重修大殿山門 明史

明古鑑登長安龍祠道院閣詩函香來禮玉宸君

試上仙臺日已曛灞上地名重此出浙西河水又
平分天垂帶煉光流渚風振琳瑯響入雲黃葉滿
庭秋色淨洞猿林鶴自成羣

朱文公祠 在仰山書院東即蒙泉義塾改道光三
十年落成祀紫陽朱子神主仍設義學於西楹立
學規嚴考察教化一新經濟者鄒石泉先生履墀
也

嚴公祠 在千總署北祀州判嚴公公諱錦堂疾惡
如仇咸豐五年來任吾邑判初下車即驅除賭棍
殆盡四月初五夜巡夜至千總署前遇盜死之士

民哀公之志即於千總署左僻地起造嚴公之祠
肖像祀之里人陳浣江先生惟亨復作籤詩百首
便民之祈禱云

陸氏宗祠 在西關廂左

張氏宗祠 在覺王寺東

鄒氏宗祠 祠凡二一在廣福橋南門扁大書敦睦
二字支自無錫遷海甯即子宗所建以奉蒸嘗者
也一在包家街南支自餘姚遷海甯與無錫支分
為二祠中有莊親王贈魯齋公瞻雲望日四字又
有魯齋公瞻雲望日圖小像

包氏宗祠

在包家街

許氏宗祠

在新堰東

梁氏宗祠

在萬壽橋北

周氏宗祠

在萬壽巷

都氏宗祠

在東文橋左

冢墓

冢人墓大夫之掌所以辨兆域也至其鄉思其人其人亡冢斯在焉生有功德沒猶祀之冢所以藏魄者也顧聽其埋沒於荒煙野草中而不之省乎誌冢墓第九

翟妃墓 在鎮東北吳王孫權妃翟氏葬此俗呼為

翟墩朱一是為可堂集云殘榔刺塚纍々草萊中

邑人誤翟為石謂之石墩與巡司之石墩訛稱

三女堆 在覺王寺後相傳孫權第三女也吳志權

妻步夫人生二女一曰魯班字大虎前配周瑜子

循後配全踪蔡完縣志載全踪居赤兔嶺則所云
三女即踪妻無疑也墓高三丈周二畝今佛殿雄
據其半明萬曆己丑歲饑盜發之 國朝嘉慶七
年壬戌署知州黃秉哲大書古三女堆四字立石
於墓門 明吳吏部本恭詩梵宮鷓尾挿層霄荒
塚纍、草色嬌幾朵白雲松下起老僧趺坐話前
朝春游歇馬吊香魂綠酒頻澆青草根酩酊放歌
人去後崔歸松頂又黃昏 國朝朱嘉徵詩吳地
千年三女堆白雲蕭寺暮鐘哀玉衣都逐荒陵散
惟有松風林下來西陵歌笑已無言蜀帝春歸江

上魂玉座也應移霸國獨留紅粉照空原 杭世
駿詩荒阡誰記赤烏年金盃難尋玉化煙只有化
城芳草遍隨風青到夕陽邊 鄒諤詩可是燥磯
抱恨同弓刀環列倚英雄斜陽古寺尋殘碣寒食
東風話舊宮陸遜營空雲影碧翟妃塚壞草心紅
年、村徑逢游女愁聽鶯聲細雨中 朱文治海
昌雜詩孫郎霸業占東吳三女堆中可有夫巾幗
戎粧問韜畧英雄為僭不如姑 族伯蘓亭夫子
霈詩碧眼雄風炳九霄宮娥當日不勝嬌迄今青
塚何人問指點逢僧話故朝崔臺並化二喬魂斷

碣誰修竹石根惟有多情吳苑月江東依舊照黃昏

唐昇平將軍胡公進思墓 在虹橋東胡令公廟後

詳廟宇

明縣令諸純墓 在瑞光橋北公淳安人由稅戶人
才秩滿留居長安今子孫猶存許志云明洪武二
十四年海甯知縣

明候選兵部員外郎鄒公長一墓 在文進橋西公
字鴻軒予十五世祖也始由無錫遷海甯文進橋
南臥龍村迄於今子孫繩々蓋又一十有五世也

國朝節婦張曹氏墓 在張宅壩西北侍讀學士沈

翼機撰誌銘

國朝署湖南湘潭縣丞鄒公樹勲墓 在文進橋南
長安義塚 在閘北宋紹熙四年令陳恕易民田五
畝為塚置屋居僧守之又置田五十畝為歛葬之
費日久侵廢僅存址三畝二分七厘康熙十一年
里民許祚呈憲捐募開拓榛莽收化枯骨建普同
塔五所方外之僧尼俗姓之男女各有別凡貧民
孤客之無地理骨者可無投水奔路誠善舉也其
地創造僧舍佛殿齋寮溷瀉悉備請額為竹林禪

院漸加莊嚴儼設朝梵暮鼓茂林脩竹僻靜可住
為禪栖勝地又以盧家橋內一帶為放生河禁止
網捕歸着院僧照管乾隆四年監生都瑋呈請勒
石永禁並收埋骸骨十三年監生杭萬盈捐收骨
塔

歲時

隋志有曰鹽官縣土澤沃衍商賈並湊其君子尚
禮庸庶敦龐風俗澄清道教隆洽美矣哉堯舜三
代之治再見於今日矣惟是人心不古劫火常新
言念疇昔言念深感當時是可作黍離之歌正不在歲
時之記也誌歲時第十

正月元旦官民稱賀如常儀 初三日為大年朝

傳迎佛者有頭八佛二八佛之會以正月八日十八

日會于附近寺院而覺王寺為尤盛 自十三日

始張燈凡五夜或扎成龍馬燈喧闐迎於市 簫

鼓聲塞巷陌名敲年鑼鼓 鄉村婦女每祀紫姑
以下田蠶併一年休咎若燈後則無驗其法或箕
或籬兩人扶而合於桌叩之能自起倒以起倒之
多寡判吉凶也 十八日收祖先影像 元宵節
新娶婦家以粉團相餽遺名上燈圓
二月春社各醱金具牲醴祀土穀神 初一至初七
覺王寺起七佛會婦女佞佛者若狂 十二日為
花生日各以綵幡掛樹杪
三月寒食日遍插柳於門簷或戴之首 祀祖先掃
塋墓家製青粉團供祀祀後長幼分食之亦古寒

食遺意 集少長遊村曰踏青 育蠶之家清明
日不舉燈謂可免鼠耗 清明食河螺以其殼撒
瓦上

四月為蠶月育蠶之家各閉戶親隣不輕入官府暫
為停訟謂之放蚕忙

五月五日為天中節小兒女各五色纏臂佩絹虎大
黃牌蒜葫蘆以辟邪各家貼符于堂或懸真人鍾
馱像親戚各以角黍相贈答 初一日至初五日
市河有競渡之戲龍舟凡六各爭奇鬥巧男婦聚
觀船無下篙處 夏至日記祖先

六月六日為天貺節曝書畫亦稱狗生日浴猫犬于河二十四日祀竈

七月立秋日人立飲少水謂可免生痲且止痢七夕設瓜果為乞巧會是日為總管神誕期經紀人或祀之以祈財十五日為中元節亦曰鬼節俗用釋氏盂蘭盆會競作餛飩以素饌饌享先親戚於有物故者則挈盒執帛往祭自十三日至於十八日里巷各醱金延僧施食三十日為地藏王誕插燭於地以祈佑八月十五日設宴賞秋以月餅相餉里人醱金作

社會優戲如春社

社會優戲如春社十八日為潮生日競往海上觀潮二十四日祀竈

九月九日為重陽節各以老菱黃豆筴熟食之自初一至初九玉宸道院正心斗閣各誠心禮斗

十月一日為十月朝掃塋墓如清明儀立冬日以糯米糲雜豇豆煮飯祀竈

十一月冬至日祀祖先

十二月十二日育蠶之家各以鹽滷茄灰薰揉蠶子藏之穀殼中至二十四日出浴於河以待春至二十四日以餒祀竈三十日為除夕各家具牲

醴祀神及祖先 以糯米作餈競相餽遺 懸祖
先影像燃香燭于堂 長幼團飲曰喫年夜飯小
兒女則索押歲錢 夜深祭中雷神祀竈自二十
三日至於是夕爆竹聲達旦不絕 閤家不眠名
曰守歲

物產

東坡先生曰舖糟啜滴皆可以醉果蔬草木皆可
以飽蓋人之所欲無窮而物之可以足吾欲者非
必在奇偉麗者然也長安一彈丸地所出無幾若
魏^郡開之蠊城西之瓜與夫蚕絲棉帶之屬雖未必
表^人獨出要皆可以藉之為醉飽而米市之米則
更遠矣按先志物產第十一

長安市 邵齊然杭州府志云有壩以限上下兩河
商賈舟航輻湊晝夜喧沓市無所不有非似陸放
翁之稱小市時魚蝦甚富已也 元方回過長安

市詩算橘租菱小市譚堰頭橋尾約千家人家已
盡無人處時見芙蓉一岸花 元張昱詩長安鎮
市次趙文伯韻詩淹淹遍衣衫酒未乾何如李白醉
長安牡丹亭院溥新露燕子簾櫳過薄寒春晚絕
無情可託日長惟有睡相干舊題猶在新羅扇小
字斜行不厭看 杭世駿修川舟次寄范鶴年詩
雲絮紛々嬾未收締衣相約喚輕舟涼風時拜歲
蕤竹邵替詩人習暮愁

小市 在何家壩久廢僅存其名

米市 在閘塘灣江南川楚之米無不畢集 國朝

朱文治海昌雜詩年來米價判高低黃白尖團樣
不齊近自江南極川楚長安利甲浙東西

帶市 在文進橋南北帶以棉紗織成五色備矣就近居
民皆以帶為業

朱德生堂臥龍丹 朱氏原起說云順治十四年夏

先高祖宮保總河梅麓公奉 命治河時山東兗

州府屬石香爐等處河決公自夏迄冬晝夜疏築

人夫蟻聚河干暑雨初寒每患急痧絞腸之症湯

藥罔效忽工次來一道人口授是方云是武侯行

軍備用之丹丸登山感瘴行路觸穢中寒中暑心

煩腹脹將藥少許吹入鼻孔即時心清體快公試
之驗遂名臥龍丹秘之枕中惟朱氏子孫知其方
而修合也

土產

穀之屬凡五稻類曰糯曰晚稻曰廣秈稷類曰粟米

麥類曰大麥曰小麥曰蕎麥菽類曰黃豆曰蠶豆

曰赤豆曰豇豆曰菜豆曰青豆曰白扁豆曰黑豆

曰寒豆曰刀豆曰裙帶豆即軟豆曰龍爪豆麻類曰

芝蔴曰苧蔴

蔬之屬凡三園蔬類曰冬瓜曰南瓜曰絲瓜曰西瓜

曰菜瓜俗名瓜曰葫蘆曰芥菜曰白菜曰油菜曰甜

土產

果之屬凡三園果類曰棗曰銀杏曰梅曰桃曰杏曰

李曰榴曰香櫞曰木瓜曰柿曰蒲萄澤果類曰菱

曰芡曰蓮房曰藕曰荸薺田果類曰甘蔗曰香芋

藥之屬凡三草部類曰麥門冬曰薄荷曰紫蘇曰車

前子曰天花粉曰半夏曰艾曰金銀花曰夏枯草

曰菖蒲曰大黃曰天南星曰紫花地丁木部類曰

枸杞子曰地骨皮曰桃仁曰杏仁曰桑白皮曰枇

杞葉曰榆白皮蟲魚部類曰蟾酥曰蜂房曰龜甲
曰原蠶蛾曰僵蠶曰蛇蛻曰蟬蛻曰蜈蚣
織之屬凡二卉織類曰棉布曰黃草布曰紗帶曰手
巾絲織類曰綿綢曰絹
貨之屬凡三食貨類曰冬酒曰三白酒曰菜油曰豆
油曰醬曰醋曰醬油曰麵服貨類曰棉花曰布曰
絲曰綿兜用貨類曰香曰燭
木之屬凡二林木類曰桑曰柏曰檜曰松曰梓曰桐
曰椿曰槐曰楓曰榆曰樟曰樸曰櫟曰椽曰棟曰
椽欄曰冬青曰烏桕曰白棗澤木類曰楊曰柳

竹之屬凡二大竹類曰雁來竹春社日有筍曰捕鷄
竹小竹類曰紫竹曰石竹曰方竹曰壽星竹
花之屬凡三園花類曰牡丹曰芍藥曰紅梅曰臘梅
曰白梅曰桂曰月月紅曰薔薇曰山茶曰郁李曰
木香曰桃曰碧桃曰杏曰李曰紫荊曰棗棠曰繡
毬曰紫薇曰玫瑰曰夜合曰十姊妹曰醉醺曰春
海棠曰秋海棠曰秋葵曰向日葵曰蜀葵曰玉簪
曰蘭曰水仙曰茉莉曰蝴蝶曰鳳仙曰鷄冠曰萱
曰美人蕉山花類曰野菊澤花類曰荷曰蘆花曰
白蘋曰紅蓼

草之屬凡二陸草類曰茅曰夾麥青曰燈心曰杆柯
曰萬年青曰吉祥草曰老少年曰芭蕉曰金絲荷
葉曰鳳尾澤草類曰葑曰蒲曰荻曰萍
羽之屬凡三家禽類曰鷄曰鴨曰鵝曰鴿野禽類曰
烏曰鴉曰鵲曰雉曰雁曰鳩曰鷹曰雀曰燕曰百
舌曰翠鳥曰畫眉曰竹鷄曰鷓鴣曰鷓鴣曰黃頭
曰啄木曰姑惡曰白頭翁曰鷓鴣水禽類曰鳧曰鷓
曰鷓鴣曰鷓鴣曰鷓鴣曰鷓鴣
毛之屬凡二家畜類曰牛曰驢曰羊曰豕曰狗曰貓
野畜類曰獐曰兔曰獾曰鼠狼

鱗之屬凡四池魚類曰鱣曰鱣曰鱣曰鱣
魚即歸河魚類曰鯉曰鯽曰鯽曰鯽曰鯽曰鯽曰鯽曰鯽
類曰金曰玉曰玳瑁曰水晶無鱗類曰鱗曰鱗曰鱗
魚曰鱗

介之屬凡二靈品類曰龜凡品類曰鱉
鱉出魏郭開者佳曰河螺曰田螺曰蜆曰蠔曰蚌
蟲之屬凡四巧蟲類曰蠶曰蜘蛛曰蟻子曰蜂曰蟻
候蟲類曰螻蛄曰蝻曰蝗曰寒蟬曰蛩曰螢
曰蟋蟀毒蟲類曰蛇曰虺曰蝮曰蝎曰蜈蚣曰
水蛭曰胡蜂雜蟲類曰蝴蝶曰蜻蛉曰蝙蝠曰蠍

牛曰蝮蝮曰刺蝟曰蚱蟴曰蟬曰蚊曰蚤曰鼠曰鼯曰
松鼠

人物

徵文獻之闕遺補志乘之滲漏區々不才固非其人然詩不云乎維桑與梓必恭敬止蓋嘗竊取于桑梓恭敬之義著為斯篇起自國初斷于今日若云襄陽耆舊則吾豈敢誌人物第十二倪承謙字翔彩號益齋諸生著綱鑑領要十二冊梁益增云先生七旬後手纂此書五易寒暑而後成存并以明代附焉

鄒張元字簡修髻年補邑庠生績學敦行視榮利淡如也性喜解推容常滿座與人言樂舉古先民遺

槩以為薄俗風鄉鄰子弟咸矜式焉晚構小圃蒔
花寄興以自全其天春秋終八十孫有泗一名孝
標字養素即其地闢而新之疏泉疊石招賓客游
咏其中蓋以承先志云年七十餘卒

毛元勳字濟蒼號松塵諸生著松塵齋詩稿九卷輜
軒錄一冊

何之鯨字湘洲諸生著存素齋詩稿集中修川竹枝
詞寫長河風景頗為確切

谷鏞字震寰號筠軒官雲南廣通縣典史著春旭堂
稿

鄒直夫字古愚號魯齋康熙壬申歲貢公壯游京師
鎮國公延館於承寧軒著有左傳直解又客莊親
王邸館於來復齋每賦詩王為擊節時值高麗使
臣入貢乞詩盡以所作付之故流傳絕少公栖遯
王公之門凡數十年未嘗有所干請其耿介拔俗
之表概可想見也歸時莊親王題瞻雲望日四字
贈公蓋公別鎮國公詩有瞻雲望日心何限之句
也從子淳字厚源號石塘搜羅公之散佚成所見
集又自著草間吟輯鄒氏族譜八冊蓋其時錫山
宗伯公一桂正修宗譜魯齋公一支自餘姚遷來

世系無所攷譜不能載故石塘自輯一譜存之祠云

章含字魯得號石泉工詩文善行楷常館耕餘小圃為主人撰記一篇并書以鐫於石時稱二絕

鄭廷舉字玉倩號疇占諸生寄籍錢塘常著間吟錄先曾祖諱雲中字望龍號潛庵性剛直常面詰人過養素公與公兄弟也小圃之費不下萬金圃北有隙地先曾祖植桑藝菜於其中養素公欲圖成方圓許以膏腴相易先曾祖怒曰農非地不生爾忍以祖宗膏腴地作遊戲耶卒不許其剛介有如此

此晚年學益進刻印曰平心老人嘗憐風之不去身

李紹安字欽思號止溪乾隆丁酉舉人嘗搜輯康熙以來修川耆舊遺稿為我閩集二冊又著止溪詩稿汪小海淮為之序惜俱未刻

鄒廷梅字作和號調梅諸生著調庵雜草

鄒麟字紱書號蘭莊著蟋蟀吟

汪淮字小海又字蘭儂監生由桐鄉家于鎮工書初摹山谷一變而似鄭燮人頗珍之性好為詩而其游情幽崖邃谷間挈篋攜囊重繭累跣既已徧歷武林吳興天台諸勝又溯新安江探黟山三十

六峰八巖十二澗之奇所到輒有詩後買宅杭之
東城有小米山房其山石池沼為張南垣所經營
翠蘿古柏蔚然深秀小海吟誦其中務極蕭慘孤
蔓之趣所著有浙東西詩鈔二十卷黔山紀游一
卷小海自定詩一卷其他著述尚夥子嘉植字白
榆著寒松居士詩鈔

陸景華字曙初號曉峯嘉慶壬戌進士官温州府學
教授著有東甌詩草未刊

朱有萊字北山監生選授貴州黔西州知州丁父憂
未仕服除任廣東德慶州知州以母憂歸後官廣

西彙州知州卒於任北山官德慶時行賓興禮分
俸助鄉試士有停喪不葬者為條教以勸官彙州
時有官族某橫於鄉其弟屢諫不聽具狀以訴某
賂金請治其弟罪卻之令以金與弟速改過某感
悟卒為善士他若治盜賊懲健訟則兩地皆然民
多感之事詳肇羅道仁和許公乃濟所撰墓表嗣
子鈞字筱漚官至蘇州府知府加道銜署江蘇按
察使死于粵匪之難

馬中隆字沛昌號浩軒諸生著明止堂集

曹紹字研亭貢生嘗與沈靜溪輩結長吟詩社作迎

神送神諸曲以祭歷代詩人亦風雅士也有近野
軒詩草行世

鄒樹勳號懋堂署湖南邵陽縣陰回司巡檢所著有
敝篋詩遺一卷未刻

梁齡增初名德增字同川號仙槎又號澹宜嘉慶甲
子舉人官新昌教諭著修川耆舊詩存一冊梁氏
宗譜二卷晚晴軒詩鈔十三卷石舫園詩鈔一卷
晚晴軒雜文一卷 徐瀛修川耆舊詩存序云長
安之名見於咸淳臨安志愚按元豐九域志已有
而陸放翁入蜀記作長河此修川所由名也市為

兩浙衝衢名流之題咏邑士之酌唱見於宗元以
來諸賢專集者尚可考其一二而州乘略之殊可
慨已同年梁園廣文以通經之才抱著述之志懼
修川耆舊之弗彰也乃於味道餘閒廣為搜羅成

國朝詩存若干卷其中耆懷先澤慨念政人大
旨近詩話叢載之體亦創例也今癸卯元日先生
歸道山令嗣仲山以先生手輯遺稿見示予受而
讀之因憮然曰自聲律之道行士大夫以下迨及
悒鬱抱志之士莫不藉流連歌詠以抒其勃然欲
發之氣奈身沒名湮者比々然矣先生雖未任輜

軒之使而能於釣遊之地不使者舊漸滅不傳豈
非鄉里之幸哉 國初以來寓居修川者則陸麗
京賈藥虹橋冰修先生亦常往還酌唱近則杭堇
浦太史因修志僑居長河即以修川名其集此寓
公之卓然可傳者似宜補及至吾邑先賢之詩向
無專選近因耕崖孝廉有海昌詩繫之作竹泉明
經續之曹相石徵君輯硤石詩鈔查南廬茂才錄
花溪遺詩今先生手編之詩裒然成集使采風者
合而成之豈非鉅觀獨念予所居之郭溪僻處一
隅較之修川僅若呷齠然自雪溪雲壑而後揚風

抱雅代不乏人曩與蘓花農廣文商榷菟輯用備
藝文之采擇而馳驅南北卒未遑今花農墓木
已供孑然寡傳同志無人揆諸桑梓敬恭之義能
勿慨然因讀修川詩不禁重有感焉時癸卯六月
上浣

何孝子輝華煜華者兄弟也父卒無以為生輝華年
方冠為人賃舂日得米二升薪一束以養母及弟
妹暇則為嬰兒嬉戲狀以娛母病二孝子日夜
號泣求以身代煜華就隱處割臂肉和藥以進母
卒不起匿其創終日不脫衣或問其故輒哭失聲

田汝成西湖遊覽志餘云慶宗金白皇后會稽人
理宗之妻聖夫人姪女也生少帝宗止從少帝
入朝于燕京後為尼正智寺為尼后北去時
手寫其像以遺族人廣額鳳目雙眉
侵整其衣則編素道服也族人居杭
之長安鎮懼禍者或別為蘇氏云

年三十六以歿卒輝華大慟亦旋卒潘梧君藹人為撰二何孝子傳

鄒諤字灌畦號介石歲貢生遷老氏學和光同塵不為新絕行嘗雜行稠人中形貌浸古諸少年尾而訾之或以告不應再三云始听然笑曰遠至是乎徐曳杖去顧性實高簡貧甚獨未嘗廢詩歲大饑邑侯倡詩勸賑和者不啻千數將授梓屬名士校之曰是集也僕亦有負盛名而無詩者乎或以先生對侯曰噫吾聞之熟矣亟為我徵之然詩竟不至而先生方閉門擁筆硯務吟咏自適偶日晏猶

伏枕奴告餅罄先生據起曰得之矣奴曰安在曰吾方續對偶苦思不續今得汝言續之矣奴他顧乾笑嘗築生墻樹松栢環以老梅百本時往來吟哦其間顧門弟子曰死以片石題介白山人之墓吾願畢矣所居曰小盤谷嗣復遷西巢者數年當沒之前夕猶策杖登吳山絕頂縱覽西湖南北諸峰口吾伊不絕聲迨明日歸無疾而沒介白山人者先生晚年之別號也著有介白山人近體詩鈔一卷嘉慶己卯門人許棟刊學使李公宗昉序沈毓蓀字于澗號蘋濱廩貢生負才名中歲出游黔

中主江西上饒靈山書院卒年八十餘著渠硯草堂詩集二十卷文集十卷所為文大半代李學使宗昉福學使中作於李學使知契尤深長安仰山書院首創建造先生力焉

陳天祐字謙終號古林又號虛谷諸生天祐父善怒天祐輒長跪請解繼以泣有弟天撫遺孤如已出世父雪樵無後天祐為之後手錄遺稿藏於篋早歲精篆刻工賞鑑旋即棄去既得甯都三魏集窮日夜肄力與沈先生毓蓀共為古文辭期成一家言嘗以已意作喪服圖與朱子合論詩主小序繼

又耽性命之學聞江左汪縉江右羅有高講學將往從之志未遂年三十四卒所著有勉鉏樓綴言古文鈔古林遺集

陳守謙字益齋職監祖堯欽長安稱首富至先生惟務吟詠晚年家益落先生懼集主計者算子孫食料至曾元輩幾不能下子先生詫曰噫吾貧矣竟以憂卒所著有嘉樹堂稿十卷其妻父汪淮為之序孫傳玉字朗山弱冠即喜吟咏善花卉頗有祖父風所著瀟碧山齋詩鈔其佳句不減溫李云都嶼字湘帆道光辛巳恩科舉人其所為駢體文

多古藻詩亦博瞻與朱子藍同里相切磋角逐詞
壇時稱瑜亮也所著有香雪齋詩文鈔若干卷
蘇亭夫子諱霈字霖三號蘇亭子從父行也性通脫
弱冠即游庠兩試鄉闈不中遂絕意仕進以訓蒙
為生所授徒如何白英國琛家子翼鵬皆顯為諸
生者又數十人予從夫子最後又最愚讀十年而
不能青一衿至使白衣潦倒窮途可愧也夫子所
著有毓秀堂稿辛丑五月間為祝融氏所收後復
不自收拾竟至失傳卒年七十餘

朱蔚初名傳曾字霞舉號子籃道光乙酉順天舉人
官工部都水司主事子藍詩矜鍊凝重教易稿始
出示人有摘其微瑕者苦思研究必字字諧適而
後止遇事感觸雖有所歎憤其詞旨必歸於和厚
晚尤好古文詞曰吾力已衰不及專工於此矣間
出一篇亦思致清折謹於法度兼工倚聲精奕理
里居養母十餘年遂不出矣己歲儉集同志為粥
以賑救其他瑣屑之事閉戶不樂聞有言及者輒
歎過一善則道之再四若欲以此諷勵世俗者嗚
呼子藍意高遠不同流俗類如此所著有子藍奕
譜盟蘭仙館詩文集

計芬字香谷善画蘭

陳定遠字又班諸生精于醫四方就治者門如市嘗
曰吾輩為醫豈能直追前古當求不負此心可也
讀仲景傷寒論畢歎曰恐不能攀其堂奧也先生
與先君為僚偕性又最合每談必徹夜道光咸中
春先君病于杭先生扁舟急視之疾愈然後歸然
非先君一人已也其待友皆如此是真古之人也

卒年七十一

鄒壽徵字芝房工寫生傳神有獨得之妙

曹楚生字寶成號少梅湖北漢陽縣丞曹東梅先生

子也生於楚故名楚生七歲父歿于任隨母梁太
孺人扶柩回及長喜書一日常十行而不求甚解
讀父書幾遍復求之戚友間獨不喜舉子業尚曰
習之而貴何如日依老母膝下之為得乎天性孝
友事母無所不至而愛友如命極好酒又喜藝花
經其手者無不活或規以無用歎曰嗟乎使我治
天下亦如此花也蓋少梅性孝友樂奉母終身原
未嘗一日忘仕進也咸豐庚申春梁太孺人卒年
八十三君哭不絕聲忽忽如有失七月粵匪進逼
人皆遷避君獨守母靈柩不為動二十五日賊至

鎮撫君去明日牽之過雙橋至精忠寺前奮袂投
于河年僅四十九

沈士鳳字春山余舅氏也性慷慨遇人有急必委曲
周之家貧苦不能當其意故居常咄咄弟軼倫
公娶婦徐性極妬且不孝公反覆開諭其弟使教
婦弟不能答而獅吼聲常徹戶外公恥之時猶未娶
竟終身不娶道光丙午以酒病卒年四十八
鄧人鑑字鏡堂有孝行母病走杭州求藥辰出行門亥
已返時稱飛毛腿云
戴次言蔣閻皆諸生善刻竹石閻字蘭如

鄒瑛工仕女

曹岱字竹溪善書

蕭琳字勺石諸生工八分書

倪祖喜字孟如寶號雲逸好讀書而厭棄舉子業
隱居修川以詩酒自娛有居易齋集見杭州詩輯

寓賢

昔王右軍守吳興登歐餘山酒酣顧謂賓僚曰百
年之後誰知逸少與諸君昇此山乎因名其山曰
昇而後人即以其山昇嗟乎予自遭寇亂避地山
陰欲如右軍之名昇山而無其才也嘗慨夫修川
一隅而多賣藥之夫矮屋三椽不少田傷心之客淒
其忍也痛何如之故雜居右軍之鄉感右軍之事
而其心固未嘗一日去乎長安也誌寓賢第十三
陸圻字麗京號講山錢塘人才性卓犖風節自許與
諸弟並有文章淵海之譽弟行人培既殉節遂絕

意仕宦賣藥長安市上僦居大虹橋之左有題壁
詩云江南烟景見垂楊三月風花拂地長莫辨入
山行藥處大虹橋上識韓康千年誰是舊長安莫
問向終南徑裏看仙掌嶽蓮君却似春風吹落九河
寒後遠遊不歸或云在嶺南為僧名今龍或云入
武當為道士終莫得而知也

翁珣字龍珍錢塘人父以鹽業起家珣補諸生師事
陸行人鯤庭及其兄麗京會行人抗節橫山麗京
遠游麗京弟棲霞率妻子隱去珣亦啟父棄諸生
來隱長安市中踰年歸省其師陳瞻雲觴之吳山

酒後憑眺悲不自勝從此不入城市者三十年陳
廷會瞻雲初集有傳甚詳

范驤字文白號默庵本邑人性孝友工書法環堵蕭
然日以經學自娛尚館修川西莊時所著有得排
日記之朋從往來並詩文時事無不載錄匝歲而
畢

杭世駿字大宗號董浦仁和人雍正甲辰舉人乾隆
丙辰召試博學鴻詞官翰林著述宏富嘗應方中
丞之聘董修海塘通志館於修川者逾歲梁太史
啟心題其修川集云碎事偶拈成海錄新編待補

入鹽官蓋皆寓甯時作也

張問陶字仲冶號船山四川遂寧人與州學正朱公文治交嘗至長安館陳先生字謙益家船山善書守謙後人猶珍藏也

張駿字信裳號荔園本邑人乾隆四十五年進士改授教職常延主長安仰山書院先生待人一接以和殷勤獎借有戾於法度者微詞規戒使自悔未嘗有疾言遽色故士之久於書院者稱為慈母也卒年九十有四後十年乃與前後院長其臺灣府知府錢塘沈颺候補員外郎蕭山高鳳墓並祀稱三

先生云

王講泉先生疎未第時常至吾鎮賣字館朱子藍家趙一漁逸其名錢塘人好為詩寓鎮之閘塘灣為人司會計常於定香寺開吟社集諸名士飲酒賦詩為樂起一間軒於寺後囑其族弟次開先生之孫題額因名其社曰一間

吳鳴九字鶴亭號松谷道人行三廬州巢縣人人稱吳三先生而不名先生善二王書喜吟詠年三十許即來客修川至六十餘客囊漸空始以訓蒙為生所著有畫餅集若干卷其晚年所得復改題曰

話柄

張復字子真錢唐諸生道光己亥因趙子一漁來游
修川先生性恬澹弗尚榮利嘗挾所為文出遊當
世陽湖洪亮吉奇其才許以名山業晚年始學佛
卒於越之斗門鎮年七十二有茹古齋詩文鈔行
於世

雜記

誌一鎮而叢脞夢見不可也太簡又不可也是故
紀土產而市廛以先詳公署而職官附後雜欲從
其略不可得也若夫災祥物變瑣事枝談存之或
以補野史之闕遺棄之未免失一鄉之故實是又
烏可已乎誌雜記第十四

宗建炎三年三月高宗南渡庚辰發秀州次長安關
辛亥次杭州見陳壽日曆

讀史方輿紀略云南宗運道俱自長安入艮山水門
抵東新河而止

宋德祐二年正月壬午元伯顏帥師次長安尋進兵

臨平

元郭昇客杭日記至大戊申九月廿一日晡時上長安買飯

宋陳遷紹興中官翰林御醫供奉今長安市陳木扇世醫之祖也子姓尚繁衍遷有秘蘭全書四卷傳後明李氏光陽西湖逸史云紹興三年著其家秘之無刻本余于人家敝書中得其一冊亦其徒之所傳寫者

明誠意伯基有寄長安章子智詩見集中

籌海圖編云嘉靖三十四年五月甲午朔戊午倭千餘自海鹽經袁花次日暮掠長安初佯市飯一畢遂入客舍殺掠

又云嘉靖三十五年三月賊首徐海陳東自柘林沿海而來過海鹽轉塘灣指揮徐行健擊之衆寡不敵而死賊因分作二支一至長安一由硤石抵章

婆壇與長安賊合知杭州有備不敢攻而去明錢佩嘉靖中從戚繼光備倭興化仙游等處以功授海甯所百戶後鍊兵薊鎮陞千戶佩鎮之西關廂人

郭郊直隸肥鄉人正德十一年以進士知海甯縣介
守過人明斷得大體擢南戶部主事疾作卒于長
安鎮遺篋不能營殮具其廉如此見許志
程進書字燕春居修川以治錫為業聞鄰說傳奇者
悅之假歸潛鈔而默誦之遂解為詩頗有警句卒
年僅二十七著程燕春遺詩一卷潘藹人曰其詩
好為綺語體尤近香奩蓋由傳奇入故也卒後數
年徐韻伯就其家求詩篇帙已散亡矣僅得近體
二三十首錄之以寄石門施少峰仁和宗小菴兩
先生皆賞其詩慨惜其人以為胡釘鉸之流亞云

汪夢樓文集

汪夢樓文重熙壯歲出游遂寄籍大興入泮年六十
餘始一回家掃墓余晤於武林吳氏之安雅堂同
寓旬餘侃侃而談不少衰尚見其和澹齋文慶詩
云分手長安道歸期賦浩然羨君雙壁合讓我一
鞭先莫漫悲華髮終須棄敝壇別離何足恨振翮
鴈行邊

道光間修川藏書家朱子藍第一許氏次之金石則獨
推許氏

耕餘草堂校刻黃氏日抄係家孝標公張子諸生月
為公所梓板藏小圃道光初年邑大饑後人用以

作薪此較劈四唐人集板煮茶者更自不堪
朱子藍水部曾作紫砂壺分贈同好予家猶藏其一
形製古樸高約二寸許蓋上摹瓦當文延年益壽
四字兩旁一刻畫竹款書子竿二字一刻銘曰娟
娟缺月土花蝕拓之療我金石癖疑有清風生兩
腋款署盟蘭二字底有印曰石棹摹古所畫竹為
嘉興張熊作銘則子藍自製也考製紫砂壺之佳
者有時大彬有供春今此石棹實不亞於二人
盧家橋梁氏有明威大將軍繼光所書烟脚二大字
真蹟

覺王寺方丈有趙子昂畫馬

鎮東官家壩每春水生時魚鰕甚富居民爭取之後
壩移于稍北魚鰕竟寂然或言中有聚魚石重建
時為匠氏所竊故耳

范默菴先生日記一冊初藏陳澗香家後為其師都
玉溪所據

玉宸道院之玉皇樓為鎮西最高處南望見龕嵒兩
山西望則犢山半角隱々樹杪昔聞沈蘋濱都見
心兩先生春月登樓間眺時菜花盈野夕陽在山
都忽曰山頭落日沉于澗有對乎于澗沈先生字

也沈即對以樓上看花都見心天生巧語一時合
拍時人傳為佳話

覺王定香兩寺有所謂房頭者分別門眷各有僧主
之人家歷代宗支祖先名號皆有冊開載久而不
忘如有凶喪其僧到門誦經按清波小志云明孝
惠皇太后為貴妃時憲皇問何處人奏曰錢塘人
即命內監至杭訪問不可得復問后曰我家門眷
是天長寺僧如其言訪之果得藉僧以紀世系而
即以傳其子孫自明已然其所由來亦遠矣
乾隆間精忠寺僧金如善畫竹成豐間文昌宮僧倚

松工寫生然金如之竹人皆寶之倚松直土直視
之耳

康熙壬午四月鎮之定香橋民周思桃家產一猪三
目六足一目在額二足在腹見東軒主人述異記

同治丁卯秋七月既望日茗上



王弼拜讀於怡溪客舍

此係初稿矣後成國三月又於備志中刺取數十條增補
其錄并錄入夏公種少坡先生卷 先生傳詳載原
舊志于初年侯暇再錄於此庶不致兩有所異由竊回
百十四甲子老人憐筆南 識時不與壽祺計世北上正振
中七十八名進士之日也